

## ■ OPINIUNS

# Ina clara decisiun, in clar signal!

Dacuort ha la 100avla radunanza generala dall'Uniun cantunala da catschadurs da patenta giu liug a Tavau. Denter auter ei il parlament dils catschadurs era s'exprimius davart l'iniziativa encunter la catscha d'atun ni la catscha supplementara, sco ella vegr era numnada. La parola ei clara. Cun 192 encunter 11 vuschs e treis abstensiuns han ins decidiu a moda perschadenta da cumbatter cun peis e mauns quella iniziativa.

Igl onn 1910 ha il cantun schau examinar ina cumissiun co ei fussi pusseivel da recaltgar dapli daners entras la catscha. La cumissiun ei vegrda tier la conclusiun che quei seigi pusseivel mo entras l'introducziun dalla catscha da revier. Quei ha fatg vegrir attents ils catschadurs. Tochen igl onn 1913 ha ei dau in techer ruaus. Lu ha il pievel acceptau la revisiun parziala dalla lescha da catscha, malgrad che quella ha alzau il daner per la patenta da 12 francs sin 40 francs, da lezs onns in alzament considerabel. Avon quella votaziun han 19 catschadurs fundau ils 16 da mars 1913 a Landquart l'Uniun cantunala da catschadurs da patenta. Cun forzas unidas levan els cumbatter il sistem da revier e s'engaschar pil manteniment dalla libra catscha da patenta. Oz dumbra quella uniun 74 secziuns ed ad ella appartegegnan ferm 8000 catschaduras e catschadurs. Era oz smanatschan da tuts prighels encunter la catscha. Pil mument stat ina iniziativa encunter la catscha supplementara avon porta. Quella catscha caschuna dapi onns vivas discussiuns, era enteifer las retschas dils catschadurs. Tenor lescha ei il cantun obligaus da reglar las populaziuns dalla

selvaschina. Els biars cass reussescha quei senza grondas difficultads cun nies sistem dalla catscha da patenta enteifer nossas catschas usitadas. Empau problems caschuna la regulaziun dallas populaziuns dallas tscharvas. Enteifer la catscha dil settember eis ei buca pusseivel da sittar il diember pretendiu. Ins ha gia empruau da tuttas variantas, denton senza il success gjavischau. Duront il settember sesanflan biaras tscharvas el Parc Naziunal, ordeifer ils cunfins dil Grischun ni els asils per selvaschina. Quella selvaschina setegn si pér tard igl atun en territoris nua ch'ins sa far catscha sin ellas. Perquei sto ei esser dau la pusseivladad da far catscha enteifer ils meins november e december sin quels animals. L'iniziativa pretenda ch'il diember da tscharvas stoppi vegrir reglaus enteifer ils meins settember ed october. Ils iniziants presentan praticamein neginas sligiaziuns co quei duess atgnamein esser pusseivel da far. Cun scumandar la catscha supplementara ei il problem buca sligiaus. Da quei ei era la pluralitat dils catschadurs perschadida. Cun rodund 95% dallas vuschs han ils delegai decidiu dacuort da cumbatter quella iniziativa, priu il cass che quella vegr avon il pievel. A caschun dalla radunanza ein negins dils adherents dall'iniziativa s'exprimi. Clar ch'ei drova dabia curascha da s'exponer «ella tauna digl uors». Sto esser ch'ils arguments mauncan ni ch'els perschadian tuttina buc avunda, pertgei munconza da curascha civila less jeu buc attestar ad els. La radunanza da delegai fuss stau il liug adattau per ina discussiun pro ni contra la catscha supplementara. Mo

cun brevs da lecturs, cun attaccas nunfundadas, cun derasar caussas che constatan buc e cun sveglier fallidas emozions eis ei buca fatg. Pils catschadurs resta ei da star attents. Cun votums fundai e perschadents stuein nus informar la glieud che va buc a catscha sur dalla necessitat dalla catscha supplementara. Duess l'iniziativa vegrir avon il pievel vala ei da ponderar bein co votar. Vegrness quella iniziativa malgrad tut nos sforzs tuttina acceptada dil pievel, savess quei haver nauschas consequenzas per nossa libra catscha da patenta. Per quella ein nos antenats s'engaschau cun peis e mauns gia avon tschien onns ed era nuslein buca schar metter ella en prighel.

Ins auda gia che zanua ord in cagliom semus-chegei in'autra iniziativa, ina aunc bia pli radicala. A mi para ei che biara glieud hagi piars la sauna relaziun tier la natira. Quei che trumpscha mei aunc bia pli fettg ei il fatg che era catschadurs tegnan si sac a tendenzas da personas extremas, personas che han en mira dad insumma dismetter la catscha.

A caschun dalla radunanza da delegai han ins era eligiu in niev comite central cun *Robert Brunold* da Sursaissa alla testa. Els ein cunscients da lur greva incarica. Tonpli eis ei stau impurtont ch'il parlament dils catschadurs prendi ina clara posiziun encunter l'iniziativa pil scamond dalla catscha supplementara. Cun quei clar votum sa il comite central sepreparar ad uras e cun fermas armas da cumbatter l'iniziativa, priu il cass che quella vegr avon il pievel.

*Venanzi Nay, Zignau, delegau secziun Tödi*